

# **Ya ikalwan hulat ni apostol Pablo kanlan ampaniwala kan Apo Jesu-Cristo ha Tesalonica**

## *Paunan habi*

Habaytsi ay ikalwan hulat ni apostol Pablo kanlan ampaniwala kan Apo Jesu-Cristo ha balayan Tesalonica. Hilay ampaniwala kan Apo Jesu-Cristo ha balayan Tesalonica ay panay ampairapan lan Israelita ya a ampaniwala kana. Kabay hinulatan na hilay na êt ni apostol Pablo ta pataniêhêna dayi ya ihip la.

Angkalipang ya ihip lan patêl kan Apo Jesu-Cristo ha Tesalonica ya tungkol ha pamag-orong ni Apo Jesu-Cristo. Endat lan kaatag ya nag-orong yay na. Endat lan kaatag pon ya a lay na kailangan hên humipêg, ta marani yanay pag-orong ni Apo Jesu-Cristo. Di ha hulat, ay hinabyanan ni apostol Pablo hilay habaytoy ayn nanan hipêg, haka impalinaw na kanla ya tungkol ha pag-orong ni Apo Jesu-Cristo.

Kabooan hên pinakalaman

Umpisan hulat 1:1-2

Pahalamat ha paniwala lan Tesalonica 1:3-12

Aral ya tungkol ha pag-orong ni Apo Jesu-Cristo  
2:1-17

Aral ya tungkol ha panalangin haka kahipêgan  
3:1-16

Tawlin habi 3:17-18

<sup>1</sup> Hiko hi Pablo, kalamo ko hi Silas haka hi Timoteo ya ampipangumusta kamoyun patêl ha Panginoon ya atsi bahên ha Tesalonica ya angkapi-tsi-tsipon. Hikaw ay atsi ha lokop ni Panginoon Jesu-Cristo haka ni Apo Namalyari, ya Tatang tamo.

<sup>2</sup> An-ihalangin naêñ kaw ya dyanan kaw dayi hêñ kapatêkbékan nakêm, haka ingalwan kaw dayi ni Apo Namalyari ya Tatang tamo, haka ni Panginoon Jesu-Cristo.

*Ya pamanatol ha pag-orong ni Panginoon Jesu-Cristo*

<sup>3</sup> Patêl ha Panginoon, dapat panay naêñ kaw ipahalamat kan Apo Namalyari. Hêpat ya habayto, gawan angkapahanan ya paniwala yo kan Apo Jesu-Cristo haka ya pamanlugud yo ha miha ta miha.

<sup>4</sup> Kabay an-ipagmahlay naêñ kaw ha kaatag ya patêl ha Panginoon ya angkapi-tsi-tsipon. An-ipagmahlay naêñ ya kataniêhan paniwala yo kan Apo Jesu-Cristo, ampagtêêhan yo man ya hadyay kairapan haka ya hadyay pamairap.

<sup>5</sup> Habayto ay ampamaptêg ya makatoynungan ya pamanatol ni Apo Namalyari, haka kabay hikaw ay mag-in hêpat hêñ ilamo ha pamanlokop na ha langit, ya ikatêêh yon kairapan.

<sup>6</sup> Makatoynungan ya pamanatol ni Apo Namalyari gawan hiyay manumbah ha ampamairap kamoyu.

<sup>7</sup> Ta hikaw ya ampagtêêh hêñ kairapan ay paynawaêñ hêñ kalamo naêñ ha pag-orong ni Panginoon Jesus ya ubat ha langit ya kalamo na hilay makapangyarihan ya anghel na.

<sup>8</sup> Pag-orong na di, ay nakapalibot kana ya hadyay apoy, ta parusaan nay a nagpalokop kan Apo Namalyari haka a anhumonol ha Mangéd ya Habi tungkol kan Apo Jesus, ya Panginoon tamo.

<sup>9</sup> Ayn angga ya parusa kanla, haka angga-angga, ay a la mahélék ya Panginoon, haka ya kapapaépapah ya kapangyarihan na.

<sup>10</sup> Maubuh hén malyari ya habayto ha pag-orong na. Mag-orong ya, ta êmén la yan pag-épapahan, haka puriên lan kaganawan ya pinili ni Apo Namalyari hén mag-in kana. Hikaw ay kalamo bayro etaman, ta pinaniwal-an yo, ya impamwang naén kamoyu.

<sup>11</sup> Kabay panay naén kaw hén an-ilamo ha panalangin kan Apo Namalyari, ya dayi ay daygén na kaw hén mangéd, ya hépat kanlan pinaihipan nan magpalokop kana. Dayi dyanan na kaw hén kapangyarihan na, ta êmén yo mahonol ya kalabayán yon manyag kangérán, gawan ha paniwala yo kana.

<sup>12</sup> No êmbayro, ay mapuri ya Panginoon Jesus gawan ha biyay yo, haka hikaw man ay madayêw hén kalamo na, gawan ha ayn kapantag ya ingalo ni Apo Namalyari haka Panginoon tamon Jesu-Cristo.

## 2

*Ya pay-iltaw hén hadyay dawak ya poon hén kahalanghangan*

<sup>1</sup> Amêhén, patêl ha Panginoon, ay ipapakalinaw naén kamoyu ya tungkol ha pag-orong ni Panginoon tamon Jesu-Cristo, haka ha pamitsipon na kantamo hén manupa kana.

<sup>2</sup> An-ipakihabi naêñ kamoyu ya paan kaw dayin manyagah o mampotog man, ha balita ya nilumatêng ana kano ya pag-orong hên Panginoon. Paan kaw maniwala ha balita la, habiêñ la man ya impamwang ya habayto hên Espiritu ni Apo Namalyari, o habi kano, o hulat man ya banhagan lan ubat kannaêñ.

<sup>3</sup> Paan kaw paloko ha panhabiêñ lan mapaglaram, ta a ya lumatêng hi Panginoon Jesu-Cristo, no a pon malyari ya hadyay panhumalang-hang hên tawo kan Apo Namalyari, haka no a pon iiltaw ya poon hên kapatsi ni Apo Namalyari, ya siguradon migtan ha impiyerno.

<sup>4</sup> Halanghangêñ na hi Apo Namalyari haka ya balang ansimbaêñ hên tawo, ta itag-ay nay sarili na, ta hiyay nay simbaêñ hên kal-atan ha Templo, ya bali ni Apo Namalyari, ta hiya kano hi Apo Namalyari.

<sup>5</sup> Muwang yo ya hinabi kinay hatsi kamoyu hên atsi ko bahêñ.

<sup>6</sup> Muwang yo etaman no hino ya, ya ampamiawat kana, ta êmêñ ya a pon iiltaw angga ha a pon lumatêng ya panaon na.

<sup>7</sup> Ta ya kapangyarihan hên kahalanghangan ha kangêran, ay naumpisaan hên a la muwang hên kaatag, ta ampamaihip ya ha tawo ya manalang-hang hila, noa, hiya ay nakakabat pon, kabay a ya pon ipaltaw angga ha a pon inalíh ya ampamiawat kana.

<sup>8</sup> No inalíh ya ampamiawat kana, ay pay-iltaw yay na. Noa, ha pamanlumatêng ni Panginoon Jesus hên kalamoy kapahilêw ya kahampatan na, ay patsêñ nay na ha inanawa nan bêngat.

**9** Ya pamanlumatêng nan habaytoy poon hên kapatsi ni Apo Namalyari, ay main yan kalamo hên narawak ya kapangyarihan, haka hino-hino kay na hên ya tanda, ya pamanloko, haka kaatag pon ya kapapaêpapah ya kalaraman ni Satanas.

**10** Kalamo na êt ya hino-hino kay na hên ya karawakan ya pamanloko na kanlan tawo ya mipalako ha kaparusaan ha impiyerno, gawan a la panlugarêñ ya kaptêgan ya tungkol kan Apo Jesus, ta êmén hila dayi mailigtas ha kaparusaan.

**11** Kabay paulayan hila ni Apo Namalyari hên maniwala ha dyag ya kalokwan,

**12** ta êmén hilay na maparusaan gawan pinili lay karawakan, ta ya kaptêgan ay a la pinaniwal-an.

*Hikitamo ay pinili hên mapagkalamo ni Apo Jesu-Cristo ha langit*

**13** Noa, hikaw, patêl ya anlugarêñ hên Panginoon, hépat kannaén ya panay naén kaw an-ipagpahalamat kan Apo Namalyari ta pinili na kaw hên iligtas ha kaparusaan ya lumatêng paubat hên una, gawan dinyag na kaw hên Espiritu na hên malinis, hên ayn kapintasan, haka gawan pinaniwal-an yoy kaptêgan.

**14** Ya Mangêd ya Habi ya in-aral naén kamoyu, ay habayto ya ginamit ni Apo Namalyari ha panagyat na kamoyu hên magpalokop kana, êmén kaw makapakilamo ha karanganan ni Panginoon tamon Jesu-Cristo.

**15** Kabay, patêl ha Panginoon, pataniêhêñ yoy ihip yo. Ipakatanêm yo ha ihip yo ya intoro naén kamoyu, ya hatoy hinabi naén haka hatoy inhulat naén êt.

<sup>16</sup> Ampanalangin kay kan Panginoon tamon Jesu-Cristo haka kan Apo Namalyari, ya Tatang tamo ya nanlugud kantamo. Gawan ha ayn kapantag ya ingalo na, ay dinyanan na kitamo hēn kahiglaan nakêm ya a ampangoman, haka kasiguradoan hēn tungkol ha arapêñ tamo.

<sup>17</sup> Hiya dayi, ya mamahigla haka mamataniêh hēn nakêm yo, ta êmên yo maihabi haka madyag ya panay kangêran.

### 3

#### *Ihalangin yo kay*

<sup>1</sup> Patêl ha Panginoon, bayo ko yariêñ ya habaytsi ya hulat kamoyu, ay ampakihabi ko ya ihalangin yo kay, ta êmên ya habi ni Apo Namalyari, ay tambéng mibahwag, haka paniwal-an hēn balang miha, hēn main galang, hēn nanad ha pinaniwal-an yo.

<sup>2</sup> Ihalangin yo êt ya illagan na kay ni Apo Namalyari ha kaganawan ya ampanyag karawakan, ta main mal-at ya ayn pon paniwala, ya ampanalanghang kannaêñ.

<sup>3</sup> Noa, mapaypaniwal-an ya Panginoon ya mamataniêh hēn ihip yo, haka mamiillag kamoyu ha dyag ni Satanas.

<sup>4</sup> Muwang naêñ ya an-ihundo yo amêhêñ, haka ihundo yo angga-angga ya pamanhumonol yo ha toro naêñ kamoyu, gawan ampaniwal-an yo ya Panginoon.

<sup>5</sup> An-ihalangin naêñ kaw ya lalo yon matanam ya pamanlugud ni Apo Namalyari, haka ya pamataniêh ni Apo Jesu-Cristo hēn nakêm yo.

*Magpakahipêg kitamo*

<sup>6</sup> Patêl ha Panginoon tamon Jesu-Cristo, pan-iutoh naên kamoyu ha tungkulan ya indin na kannaên, ya lakwanan yo hilay patêl ya mangabarog, ya hilay a ampanhumonol ha toro naên kamoyu.

<sup>7</sup> Muwang yoy na ya dapat kaw hên manoto kannaên, ya a kay nagbarog hên atsi kay bahêñ.

<sup>8</sup> A kay bat nangan hên indin kannaên, noa, binayaran naên, ta allo-yabi kay nagpagal hên nag-obra, êmêñ a kay pabyat ha hinoman kamoyu.

<sup>9</sup> Main kay hên tungkulan hên kikwa kamoyu hên kaganawan kailangan naên, noa, labay naên hên mag-in kay hên alimbawa ya mahonol yo.

<sup>10</sup> Hêñ atsi kay êt bahêñ, ay hinabi naên kamoyu ya paan yon pakanêñ ya mangabarog.

<sup>11</sup> An-ungkatêñ naên habayto gawan angkagilaman naên ya bahêñ kamoyu, ay main mangabarog ya bat hên ampakiêmêñ ha biyay hêñ kaatag.

<sup>12</sup> Ha langan ni Panginoon Jesu-Cristo, ampakihabi naên kanla, haka an-iutoh naên hila, ya magpakahipêg hila ha mangangêd ya dyag, êmêñ la maêkan ya pinagpagalan la.

<sup>13</sup> Patêl ha Panginoon, alwa kaw hêñ humawa hêñ manyag hêñ kangêran.

<sup>14</sup> Pakatandaan yo hila ya a anhumonol ha anihulat naên, haka dayuán yo hila, ta êmêñ hila mipakarêng-êy.

<sup>15</sup> Noa, paan yo hilan itad hêñ kapatsi yo, ta habyanan yo hila tanan nanad patêl.

*Inhalangin ni apostol Pablo ya hilay taga-Tesalonica*

**16** Ya Panginoon ya ampangubatan kapatêkbêkan ay panay dayin mam-in kapatêkbêkan kamoyu, hinoman ya angkalyari. Dayi lamoan na ya balang miha kamoyu.

**17** Hiko hi Pablo ya ampanulat hên hata pangmusta di ha impahulat ko. Ha pêtêg kon gamêt ay ampanulat akon habaytsi hên nanad ha balang hulat ko, ta êmén yo mamwangan ya pêtêg ya hiko ya nanulat.

**18** An-ihalangin naên kaw ya dayi ingalwan na kaw ngan ni Panginoon tamon Jesu-Cristo.

# **Ya habi ni apo namalyari: Bayon tsipan - Ayta Mag-antsi**

## **New Testament in Ayta, Mag-antsi**

copyright © 2006 Wycliffe Bible Translators, Inc.

Language: Mag-antsi Ayta (Ayta, Mag-antsi)

Translation by: Wycliffe Bible Translators

Contributor: Wycliffe Bible Translators, Inc.

### **Copyright Information**

© 2006, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 9789718260654

### **The New Testament**

in Ayta, Mag-antsi

**© 2006, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

x

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-03-17

---

PDF generated using Haiola and XeLaTeX on 18 Apr 2025 from source files  
dated 29 Jan 2022

d2289d90-e8af-5f04-a1e1-312fd0921aff